

Retningslinjer ved tildeling av skuleplass i Volda kommune

Utarbeidd med heimel i Lov om grunnskuleopplæringa og den vidaregåande opplæringa (opplæringslova) § 2-6 og vedtekne skulekrinsgrenser i Volda kommune. Sist endra i vedtak 26.11.2020.

1. Formål, verkeområde og ansvar

1.1 Formål

I opplæringslova § 2-6 heiter det:

Elevane har rett til å gå på ein skole i nærmiljøet. Kommunen kan gi forskrift om skolekrinsar. Ved tildeling av skuleplass og fastsetjing av forskrift om skolekrinsar skal kommunen leggje særleg vekt på kva skole som ligg nærast heimen. Kommunen kan også ta omsyn til topografi, trafikktilhøve og kapasiteten på skolane, og at barn i same nabolag skal få gå på same skole.

Etter søknad kan eleven takast inn på ein annan skole enn den eleven har rett til å gå på,

Retningslinjene skal gje oversikt over kva for område i kommunen som soknar til kva for skule. Den skal gjere det føreseieleg for innbyggjarane, og er særleg viktig for foreldre og elevar. Retningslinjene skal vidare bidra til rask, føreseieleg og likeverdig handsaming av søknader, vedtak og klager på tildeling av skuleplass.

1.2 Verkeområde

Retningslinjene ved tildeling av skuleplass gjeld alle born busett i Volda kommune som har rett og plikt til grunnskuleopplæring etter opplæringslova § 2-1.

1.3 Ansvar

Kommunedirektøren har det overordna ansvaret for å ivareta dei vedtekne forskriftene om skulekrinsgrenser.

Kommunedirektøren har delegert til kommunalsjef oppvekst å tildele skuleplass.

Kommunedirektøren har delegert til kommunalsjef oppvekst å handsame søknader om å gå på annan skule enn nærskulen samt handsame klager på tildeling av skuleplass.

1.4 Rettsgrunnlaget

Opplæringslova § 2-6, første og andre ledd:

Elevane har rett til å gå på ein skole i nærmiljøet. Kommunen kan gi forskrift om skolekrinssar. Ved tildeling av skuleplass og fastsetjing av forskrift om skolekrinsar skal kommunen leggje særleg vekt på kva skole som ligg nærast heimen. Kommunen kan også ta omsyn til topografi, trafikktilhøve og kapasiteten på skolane, og at barn i same nabolag skal få gå på same skole.

Etter søknad kan eleven takast inn på ein annan skole enn den eleven har rett til å gå på.

2. Vedtekne forskrifter om skulekrinsgrenser

2.1 Skulekrinsgrenser for barneskulane

Skule	Skulekrins	Grunnkrins
Mork	Lid/Mork	501-503
Øyra	Stor-Øyra	304 (inkl Ullaland, Årset og Aurstad), 401-412 Bratteberg skule er definert som nærskule for elevar frå grunnkrins 304
Bratteberg		
Folkestad	Folkestad	106, 201-203
Dalsfjord	Dalsfjord/Ulvestad	101-105
Austefjord Hornindal	Indre Volda	301-303, 305-306, 601-608 (Unnateke Ullaland, Årset og Aurstad i grunnkrins 302)

2.2 Skulekrinsgrenser for ungdomsskulane

Skule	Skulekrins	Grunnkrins
Volda ungdomsskule	Stor-Øyra/Lid/Mork	304(inkl Ullaland, Årset og Aurstad), 401-412, 501-503
Folkestad	Folkestad	106, 201-203
Dalsfjord	Dalsfjord/Ulvestad	101-105
Hornindal	Indre Volda	301-303, 305-306, 601-608 (Unnateke Ullaland, Årset og Aurstad i grunnkrins 302)

3. Tildeling av skuleplass

3.1 Adresse i folkeregisteret

Alle elevar får tildelt skuleplass ved barne- og ungdomsskular ut frå den adressa eleven står registrert med i folkeregisteret.

3.2 Tildeling av skuleplass for komande førsteklasingar

Til vanleg vert melding om tildelt skuleplass for komande førsteklasingar sendt ut i februar det året eleven skal ta til i skulen.

I Stor-Øyra skulekrins er det ikkje faste grenser mellom opptaksområda mellom skulane. Kapasiteten ved dei to barneskulane kan gjere at opptaksområda kan endre seg frå eitt år til eit anna.

3.3 Tilflytta elevar

Elevar som flyttar til kommunen får melding om tildelt skuleplass.

3.4 Søknad om å gå på annan skule enn nærskulen

Etter søknad kan elevar takast inn på annan skule enn nærskulen, jf opplæringslova § 2-6. Søknad skal sendast til Volda kommune.

Elevar kan få innvilga søknad om å gå på annan skule enn nærskulen viss det ligg føre særlege omsyn. Viss eleven etter ynskje frå eleven/dei føresette går på anna skule enn nærskulen, fell retten til gratis skuleskyss vekk. Viss søknaden er grunngjeve med pedagogiske eller sosiale tilhøve som er naudsynt for å sikre retten til opplæring, jf opplæringslova §§ 2-1 og 12-2, kan gratis skuleskyss likevel verte innvilga.

Ved handsaming av klager på kommunale vedtak om skulebyte etter § 2-6, skal statleg klageinstans legge vekt på omsynet til det kommunale sjølvstyret ved prøving av det frie skjønnet.

3.5 Byte av skule etter adresseendring

Ved flytting innan kommunen, pliktar dei føresette å gi melding til skulen, som gir melding til kommunalsjef oppvekst. Viss eleven vert tilhøyrande ein annan skulekrins, vert ny melding om skuleplass sendt til dei føresette.

Jf pkt. 3.4 er det høve til å søke om å få behalde skuleplassen sjølv om ein har flytta ut av skulekrinsen.

3.6 Vedtak om skulebyte som tiltak etter opplæringslova § 2-6 fjerde ledd

Viss det er naudsynt at ein elev byter skule for å ta i vare andre elevar sine rettar etter opplæringslova §12-2, fattar kommunalsjef oppvekst vedtak med heimel i opplæringslova § 13-2.

Vedtaket skal vere i tråd med reglane om enkeltvedtak i forvaltningslova, og i vedtaket skal det gjerast greie for skulen sitt arbeid i saka.

3.7 Utsett og tidleg skulestart

Jfr oppl.l. § 2.4, skal kommunen la eit barn byrje på skulen det året barnet fyller sju år, viss foreldra søker om det eller samtykker og det etter ei sakkunnig vurdering er tvil om barnet er kome langt nok i utviklinga si til at det bør byrje på skulen det året barnet fyller seks år.

Kommunen kan la eit barn byrje på skulen det året barnet fyller fem år, viss foreldra søker om det eller samtykker og ei sakkunnig vurdering viser at det er forsvarleg.

Barnet sitt mogningsnivå, kognitive og språklege nivå, barnet si sosiale tilpassing og evt andre særskilde tilhøve som kan ha innverknad på barnet si utvikling skal vurderast.

Barn det kan vere aktuelt å vurdere utsett skulestart for kan vere barn som med eitt år ekstra i barnehagen kan klare seg utan individuelt tilrettelagt opplæring ved skulestart. Barn som er fødde seint på året kan det også vere formålstensleg å vurdere i same lys.

Tospråklegheit er i seg sjølv ingen grunn til utsett skulestart. Det gjeld også barn med varig nedsett funksjonsevne og barn med store lærevanskar. Desse barna bør starte på skulen det året dei fyller seks år og få eit tilrettelagt opplæringstilbod der.

Lova gir ingen rett til utsett skulestart, men det kan innvilgast viss PPT tilrår dette.

Søknad om utsett/tidleg skulestart skal sendast til Volda kommune, som vil be om uttale frå PPT.

4. Diverse bestemmingar

4.1 Bestemming om når retningslinjene vert gjort gjeldande

Retningslinjene er gjeldande frå 01.08.2024.

4.2 Klagehandsaming

Melding om tildelt skuleplass og avslag på søknader om å gå på annan skule enn nærskulen er enkeltvedtak som kan påklagast etter forvaltningslova sine bestemmingar om klage på enkeltvedtak. Det same gjeld søknader om tidleg eller utsett skulestart. Klagefristen er tre veker etter at meldinga er motteke.

Kommunalsjef oppvekst handsamar eventuelle klager på tildelt skuleplass eller avslag på søknad om skuleplass. Viss kommunalsjef oppvekst opprettheld det opphævelege vedtaket, vert saka sendt Statsforvaltaren i Møre og Romsdal som fattar endeleg vedtak.

Oppvekst

Sept 2024